



Komunikadu Imprensa

17 Outubru 2013

Programa Debate Eskluzivu:

Aplikasaun suspensaun pena prizaun ba kazu violénsia doméstika entre espetativa no dezafiu

Iha 18 Outubru 2013, JSMP sei realiza debate eskluzivu ho tópiku “Aplikasaun suspensaun pena prizaun ba kazu violénsia doméstika entre espetativa no dezafiu”.

Debate ne'e atu hatene diak liu kona-ba implikasaun husi suspensaun ba pena prizaun ba kazu krime violénsia doméstika no esplora pena alternativu seluk ne'ebé apropiadu liu tuir lei atu hamenus kazu violénsia doméstika iha kumunidade, hanesan – pena prizaun, multa no pena servisu kumunitáriu.

Debate ne'e hanesan mekanismu ida atu fahe informasaun ba públiku relaciona ho asuntu pena suspensaun ba kazu sira ne'ebé ho natureza violénsia doméstika. Debate ne'e sei realiza iha Hotel Timor, Dili, iha tuku 3.00-5.00 lokraik.

Programa debate ne'e realiza ho oradór sira mak hanesan, Juis Administrador Tribunál Distrital Dili, Dr. Duarte Tilman, Soares, Prokuradór Jerál da República, Dr. Jose da Costa Ximenes no Diretór Ezekutivu JSMP, Luis de Oliveira Sampaio,

Debate ne'e, sei involve partisipante ho numeru limitadu ne'ebé mai husi dosente no estudante universitariu husi fakuldade direitu sira husi UNPAZ, UNTL, UNDIL, UNITAL no representante organizasaun sosiedade sivil ne'ebé servisu iha area prevensaun violénsia bazeia ba jeneru hanesan FOKUPERS, AIFeLa, no AATL hanesan sumbriña ba advogadu privadu sira.

Objetivu husi debate ne'e atu deskobre espetativa no dezafiu institusionál husi autór judisiáriu sira relaciona ho atribuisaun pena ka sentensa ba kazu violénsia doméstika liu-liu preferensia(*kencenderungan*) atu aplika suspensaun ba pena prizaun ba kazu violénsia doméstika. Aleinde ne'e atu esplora dezafiu ne'ebé enfrenta iha prátika no dezenvolve pena alternativa seluk atu aseguira pena apropiadu ba arguidu atu prevene no redus akontesimentus violénsia doméstika iha futuru.

“JSMP fiar katak ho debate ida ne'e bele hetan autór judisiáriu sira nia perspetiva kona-ba mekanismu atribuisaun pena ne'ebé adekua ba violénsia doméstika hanesan krime públiku tuir regra prosesual penál ne'ebé aplikavel”, **dehan Diretór Ezekutivu JSMP, Luis de Oliveira Sampaio.**

Aproveita oportunitade ne'e, JSMP enkoraja ema hotu atu kontribui ativamente hodi dezenvolve setór justisa no lejislativu Timor-Leste sai forte hodi aseguira katak ema hotu hetan protesau adekua no sira ne'ebé sai vítima hetan justisa ba sira nia kazu.

JSMP la haluha agradese ba apoiu husi Embaixada Noruega-Jakarta, no mós ema hotu ne'ebé fó ninia kontribuisaun atu apoiu programa JSMP nian to' o ohin loron.

Atu hetan informasaun klaru no kompletu liu, favor ida kontaktu direktamente:

Luis Oliveira Sampaio
Diretór Ezekutivu JSMP
E-mail: luis@jsmp.minihub.org
Website: www.jsmp.tl
Telefone: 3323883/77810637